

鄉土志業編

張國淦著





岐山縣鄉土志目錄

卷一

歷史

政績錄

兵事錄

卷二

耆舊錄

卷三

人類

戶口

氏族

宗教

一

一

六

一

一

一

一

二

實業

地理

古蹟

祠廟

坊表

橋梁

市鎮

學堂

山

水

道路

物產

商務

三

三

四

五

六

六

七

七

七

九

一

二

三

岐山縣鄉土志卷之一

歷史

岐山控右輔之阨乃成周發祥之地其建置之年所屬之郡國沿革可得而攷也  
志歷史

自太王遷岐而岐周之名始著其以岐山名縣則始於隋開皇十六年溯自未置  
本境以前黃帝制九州而岐山屬雍唐虞分九州爲十二夏還爲九州商稱九有  
周屬職方不變夏制而本境之屬雍者如故周自古公亶父去邠踰梁始建國於  
岐地迨文王治岐其地寢廣及至遷豐分岐周故地爲周召采邑平王東遷以岐  
西地賜秦襄公而春秋戰國之世岐地遂爲秦有秦有天下本境屬內史郡兩漢  
以降建置紛如分合不常在漢屬右扶風而雍縣杜陽美陽分岐之北境郿虢二  
縣分岐之南境魏改右扶風爲扶風郡至晉惠帝時更名秦國而省杜陽改虢爲  
蒯城岐之舊屬虢者爲蒯城之東北境舊屬杜陽者爲雍之東境美陽之西境北

岐山縣志卷之三  
魏置岐州領郡三縣八而岐地分屬於平秦郡之周城橫水武都郡之平陽武功郡之美陽西魏改岐州平秦郡爲岐陽郡以橫水入雍而改平陽爲郿城岐地之分屬者如故後周割涇州鶉觚縣南界雍之西界置三龍而遂廢美陽又移置周城於郿城雖分合不常然尙未有岐山之名也隋廢岐州爲扶風郡始改所領之三龍爲岐山又改屬南境之周城爲渭濱尋復爲郿唐武德三年移岐山治張堡而析置漳川縣七年又移治龍尾坡貞觀七年析本境及京兆之上宜復置爲岐陽縣八年省上宜入岐陽又移治於豬澤南卽今治至德中復今名後遂不改有唐一代本境隸關內道五代因之宋隸秦鳳路扶風郡金隸鳳翔路元隸陝西行中書省明隸陝西布政司 國朝因之而皆屬於鳳翔府此歷代建置沿革之大概也

### 政績錄

地方之風俗教化爲之也教化之隆汙官吏爲之也爲政在人古有明訓前事之不忘後事之師也岐自太王始遷契龜築室慰止左右疆理宣畝岐民世祀百世

不忘至於文王之治岐也耕者九一仕者世祿關市譏而不征澤梁無禁罪人不孥窮無告者必先焉王政治民豈惟小惠然皆國君之政未可降而與後之爲宰者伍且載在詩書人與知之茲故不具錄中若其官於岐者邑志所紀自唐宋以來其人多矣然有惠政可紀者則少今於法得錄者書之今詳而古略無實蹟者不書然祀入名宦鄉人祠祝而弗諉者雖政績湮沒不彰今亦取之若欲備覽其詳則有邑志存

金

李守節安定人興定四年知縣事時有道士市周公廟爲道宮者守節聞之怒聞於上官正其罪先是有贍廟田十餘頃久爲耕者所侵至是并復之

元

劉楨延川人至元十三年爲縣尹勸農桑修學校卓有政績賜緋同進士出身

布延特穆爾志作伯顏帖木兒至正十二年任達魯花赤置贍學田七頃八十餘畝

明

岐山縣志  
張緒宗順天固安人景泰中知縣事興舉廢墜牧愛有守今祀名宦祠

榮節河南遂平人宏治四年由進士爲知縣廉勤有爲政教兼舉多所建置蒞岐五年陞戶部主事至青州知府又有江玠者四川巴縣進士宏治中亦宰岐歷陞陝西副使至參政蒲軾四川崇慶人嘉靖中知縣事省志均載入名宦焉

陳鶴陽四川資陽人公廉明斷興學愛民府志載入名宦令狐一豸山西猗氏人修理城池學校人多感之韓廷芳山西洪洞人勤政愛民實心任事創修邑志使文獻有徵厥功偉焉三人皆嘉靖中知縣事

馬彥卿四川內江人隆慶中知縣事操守清廉振興學校搜除弊政今祀名宦祠傅鋌直隸靈壽人萬歷中知縣事解除繁苛與民休息去之日邑人作去思碑紀其政內稱開渠發倉等政詳具名宦冊中今不可得而考矣有明一代紀名宦者知縣以鋌終焉嘉靖間有候儒者山西河津人爲岐山主簿正直清廉均文明慎有功於邑邑令以下縣丞主簿等官自宋至明其人多矣然祀名宦者惟儒一人

國朝



王穀江南高郵人順治中以貢生任知縣時承平之始城郭戶口尙多凋殘穀因築繚垣以衛倉庫修廟學以培士風纂邑志撫閭閻多善政焉

孫蕙奉天人康熙十六年知縣事祀名宦

茹儀鳳字紫庭宛平人也康熙十八年任知縣有膽識凡事關教養必盡力爲之嘗修文廟及周召二公祠創立朝陽書院諸政悉舉而尤以蘇民困爲急先是岐多荒田逋賦纍纍民困追呼前令亦多以是去儀鳳至力白上官以請於朝得免荒田一千餘頃士民感之爲建生祠富平李因篤紀其事後歷官甘肅按察司副使祀名宦

任懋華江南蕭人雍正中知縣事精明強幹案無留牘治岐十載吏民畏服

陳斌甘肅徽人由咸陽丞署任居心忠厚時運甘肅賑糧於清水措置得宜閭里不擾邑人德之劉度昭正紅旗漢軍監生修築城垣之頽圯者躬親督役毫不累民孟玫河南夏邑人折獄明允操守清廉倉儲充實陳九疇山東福山人運騾滇省於民無擾邑人爲立去思碑四人皆乾隆中知縣

平世增字鑑湖浙江山陰人乾隆三十八年知縣事才識明遠遇事勤能蒞岐三  
次勤恤民隱多所營繕先是邑志自順治十四年前令王穀纂修至是已歷百二  
十年世增下車卽徵文考獻留心甄輯延燕山胡農部文銓爲之編訂未及成書  
而以委辦銅務去成之者郭履恒也履恒字臨泉山西興人以四十三年蒞任勤  
於政事前令修志未成履恒力成之修廟學改建書院置師生修金膏火費凡平  
令所欲爲而未及爲者郭令悉爲之頌平令者必並頌郭令和衷共濟二人有焉  
杜堦浙江會稽人乾隆末知縣事旋委辦漢中糧臺嘉慶初復任時教匪由斜峪  
關竄出堦率衆登城防守惟謹賊從郿竄去民得安堵焉

嘉慶間之縣令得四人焉薛困勉山西芮城人作事殷勤誠實無僞每詢民間疾  
苦有慈母之稱何紹衣浙江仁和人署任時值差徭煩重胥役爲奸民不堪命紹  
衣創立公局使邑紳主其事按賦派錢受役閭閻至今便之廖祚暉廣西臨桂人  
歷任四次勤政愛民時差務殷繁徵加過額因通詳上憲差徭除其浮濫鹽課永  
不加耗士民感戴樹碑以誌其德閩表山西文成人仁慈居心事無廢弛治岐最

久邑志有良吏之稱惠政足述可謂後先輝映矣

道光間縣令之可稱者曰徐通久仇汝弼張因培李煒通久直隸天津人作事平正潔己奉公平時勸導書院生童及鄉民諄諄不倦創修節義祠汝弼順天通州人時差局經理不得其人妄費浮支奸蠹又從中漁利牽率正人假公濟私以致累年蔓訟汝弼蒞任數月立判曲直奸蠹斂跡局務清釐人咸頌之因培號圖南直隸安肅人老成諳練承前令苛察之後與民休息有恃衿把持武斷者因培痛懲治之至今無此刁風焉煒字惺夫湖北興國人明幹有爲雖署任僅期年而籌添書院經費改定公局章程皆得政體

李文翰字雲生安徽宣城人道光二十三年知縣事性躁急而辦事勤敏邑之石頭河空塔寺僻地也突來匪徒數十盤踞劫掠文翰廉知之卽集鄉團往擒獲十二人中有隣境要犯三人皆以嚴法處之境內又安以獲盜功送部引 見二十六年旱請發倉勸捐賑濟活民無算而至今岐民受賜者尤在釐正水利一事初石頭河東有梅公孔公堰利歸郿縣而岐之諸堰皆在下游郿民復稟郿令欲於

上游之鷄冠石新開渠口郿令據稟通詳將興工岐民阻之不得以聞文瀚亦通詳於是郡守白公奉憲委查勘文瀚與郿令持議未決民情洶洶文瀚乃謂郡守曰所謂水利者因其勢而利導之也今鑿石開山以截上流不惟岐之沿河二十餘村不得水利卽郿民梅公孔公之堰其涸亦可立而待且岐郿之民一耳今郿令欲遏隄專利太尊不爲之主如大體何白公據實詳稟遂奉批禁止至今得以及時灌溉焉又工古文詞書畫著有岐邑須知頗有益於政治云

王澤春字蓮生貴州貴筑人咸豐二年以議叙知縣事愷悌慈祥識見遠大時髮捻蠢動始下車見城垣頽圯卽以興修爲己任其明年稟詳各憲就地籌款倡捐千金刻日興工計用不敷復捐四千金於是富紳商民踴躍樂輸委任得人功用速成又諭鄉民修築堡寨集團練以時巡行而訓誨之邑局自何紹衣創立至是析一爲三屢年興訟加派多而用尙不足澤春力爲清釐延邑中公正紳耆司其事仍歸統一其後二年之間派錢減少而贏餘至七千餘緡其他善政多類是澤春完固城池先事預防繼起而能守之者爲酈豫豫字立齋浙江會稽人以十年

知縣事同治初元二月渭南回變潛結鳳回至八月鳳回亦變勢甚猖獗時承平日久民不知兵豫嚴城防飭團練率衆登陴日夜守視衣不解帶者數月賊稍卻卽飭團勇出城巡防以張聲勢故近城村落賊無蹂躪至十月而援兵至賊西北竄甘肅人心稍安而豫以積勞成疾明年二月遂不起邑人士無不痛悼焉然豫固守禦得法而城垣堡寨則皆澤春所預備者歷年中髮捻回逆疊擾而全活無算厥績偉矣二人者民至今思慕不忘云

同治中陝回不靖岐亦多事矣其能爲民禦災捍患者王酈而後有黃兆熊郭昌時兆熊號渭川湖北鄖縣人三年知縣事時回逆紛擾四境騷動兵差絡繹支應浩繁兆熊調劑得宜民無所苦有來何暮之稱嘗奉委督修四鄉堡寨以堡多人少守禦難乃以小合大爲團防事竣蒙上憲褒嘉下其法使通屬做辦雖軍書旁午猶復修書院增膏火砌城堞置軍火器械平糶救荒焉後以調去邑人士詣府稟留有願借一年之語昌時號仲熙甘肅武威人以六年署任至未十日而寶鷄失守回酋崔三率衆犯境適雨衝城垣築未完勢危甚昌時登俾且築且守三晝

夜始竣賊猶未遁城內火器無多適大府委運西瓜礮援鳳翔稟請暫留以轟賊多斃乃遁去靖安營統領劉效忠故賊首投誠者也駐馬隊城中欲啓釁以肆掠昌時駕馭得宜劉無隙可乘一日忽因市銀爭價領隊挾槍礮至大堂聲言轟擊縣署或阻令勿見昌時曰我不出則城難保岐城難保則關中又添一巨寇矣遂出見邀劉入曉以大義慰以婉言劉歡然罷去乃親詣大府述其狀上憲檄劉去岐始獲安至其支應兵差經權互用聽諸訟獄開城布公邑民至今頌其老成練達能忍爲強云咸同間王酈黃郭四令邑志皆以爲宜祀名宦焉

胡元照號曉滄直隸正定人光緒元年署知縣事愛士恤民奉憲札捐辦義倉諄諄勸諭不事浮苛糧甫諸旋遇大旱民賴以得食去之日父老攀轅叩餞至有泣下者

教諭訓導之職例不得越俎民事故表見者絕少然自明至 國朝有實惠在人者得數人焉吳璽四川閬中人明宏治中任教諭嚴整勤教始傳諸生春秋學後陞至隴州知州入名宦祠張四教四川巴人明隆慶中教諭也教人正心術勤學

業謝郤貧士修儀且捐俸以濟之居三年無一疾言怒色致仕歸送者載路陶紳  
四川宜賓人明萬歷中爲教諭課士寒暑不輟尤以風節勵人士多丕變官至廣  
南府知府董朝彥清水人乾隆中爲訓導正直有膽略尤愛士諸生有負國課  
者捐俸代輸士多德之

### 兵事錄

兵者所以守土而衛民也聖王在上承平之時不忘武備計至深慮至遠也岐山  
爲秦蜀之衝聯南北山之要路則可以斷秦隴之援居左右輔之上游則可以通  
關中之氣斜谷關道險難入而復難出爲窺蜀漢者所必經五丈原勢雄可戰而  
亦可守爲圖中原者所必據龍尾坡界二壑之間爲伏兵之善地箭括嶺當斗絕  
之境亦保險之良圖自南而北者北原在所必爭由東而西者渭水必當防護縱  
觀史策歷歷不爽今於兵事之有關於岐者載之見險要之當知以爲將來之殷  
鑒云

漢元年八月漢王引兵從故道出襲雍雍王章邯迎擊漢陳倉雍兵敗走廢邱漢

兵引水灌廢邱邯自殺漢王遂盡定雍地

初平二年劉焉牧益州以張魯爲督義司馬使掩殺漢中太守斷絕斜谷閣道

建安二十二年先主爭漢中曹操出斜谷以臨漢中不克旣還數言南鄭爲天獄斜谷道爲五百里石穴

蜀漢建興五年丞相諸葛亮將伐魏使諸軍運米集於斜谷口治斜谷邸閣揚聲由斜谷道取郿魏使曹真屯郿谷以拒之

十二年二月諸葛亮伐魏由斜谷至郿軍於渭水之南司馬懿引軍渡渭背水爲壘以拒之謂諸將曰亮若出武功依山而東誠爲可憂若西上五丈原諸將無事矣亮果屯五丈原雍州刺史郭淮言於懿曰亮必爭北原宜先據之議者多謂不然淮曰若亮跨渭登原連兵北山隔絕隴道搖盪民夷此非國家之利也懿乃使淮屯北原塹壘未成漢兵大至淮逆擊卻之亮以前者數出皆以運糧不繼使己志不伸乃分兵屯田爲久駐之基耕者雜於渭濱居民之間而百姓安堵軍無私焉相持百餘日其年八月亮卒於軍及軍退懿案行亮之營壘處所嘆曰天下奇



才也

亮將北渡渭懿遣將軍周當屯陽遂以餌之數日亮不動懿曰亮欲爭原而不向陽遂此意可知也遣將軍胡遵雍州刺史郭淮共備陽遂與亮會於積石臨原而戰亮不得進還於五丈原

按積石原卽北原與前條本一事記者有異同耳陽遂當在本境但未詳爲何地二十二年魏曹爽侵蜀漢費禕進據三嶺以截爽爽爭險苦戰僅乃得過

晉永和七年四月梁州刺史司馬勳帥步騎三萬會杜洪張琚擊秦秦王健禦之於五丈原勳屢戰皆敗退歸南鄭

太元七年桓冲遣楊亮等攻蜀亮乘勝進攻涪城苻堅遣張蚝等馳救蚝出斜谷亮遂引還

十年五月慕容冲攻長安苻堅大懼以讖書云帝出五將久長得乃留太子宏守長安謂之曰吾當出隴收兵運糧以給汝遂奔五將山姚萇遣將吳忠執之以歸幽於新平

後秦平陽氏葛渴據五丈原姚謐討擒之

義熙十一年夏赫連建入後秦之新平姚弼與戰於龍尾堡擒之

齊建武二年魏拓跋英擊漢中還兵入斜谷會天大雨士卒截竹貯米執炬火於馬上炊之

梁中大通二年三月魏叛黨万俟醜奴自將其衆圍岐州遣其黨尉遲菩薩万俟忸自武功南渡渭攻圍趣柵魏爾朱天光使賀拔岳將千騎救之菩薩等已拔柵而還岳故殺掠其吏民以挑之菩薩率步騎二萬至渭北岳引百餘騎隔水與賊語稍引而東至水淺可涉之處岳卽馳馬東出賊以爲走乃棄步兵輕騎南渡渭追岳岳依橫岡設伏兵以待之賊半度岡東岳還兵擊之賊兵敗走岳獲賊三千人馬亦無遺遂擒菩薩仍渡渭北降步卒萬餘並收其輜重醜奴聞之棄岐州北走安定天光方自雍至岐與岳合

唐元和元年劉闢據西川叛詔高崇文討之崇文出斜谷

中和元年三月黃巢遣其將尙讓王播帥衆五萬寇鳳翔鄭畋使行軍司馬唐宏

夫伏兵要害自以兵數千多張旗幟疎陳於高岡賊以畋書生輕之鼓行而前無復行伍伏發賊大敗於龍尾坡斬首二萬餘級伏尸數十里

又邠甯將朱玫屯興平黃巢將王播圍之玫退屯奉天及龍尾坡

後梁乾化元年岐王李茂貞遣將劉知俊等侵蜀圍安遠軍蜀將王宗弼救安遠及知俊戰於斜谷敗之旣而岐引兵還蜀將唐道襲先伏兵於斜谷邀擊又破之貞觀六年蜀將陳彥威出散關敗岐兵於箭筈嶺

宋紹興元年十月吳玠收散卒保和尚原金將默呼自鳳翔額勒濟格自階成出散關約日會和尚原額勒濟格先至陣北山索戰玠命堅陣待之更戰迭休金人大敗遁去默呼方攻箭筈關玠復遣將擊破之兩軍終不得合

按邑志箭筈山節下注以爲此兩條所稱之箭筈嶺箭筈關皆當在汧隴之境而以彼處之箭筈谷當之謂岐之箭括山舊無置關之說其指爲岐之箭括山者係明一統志之誤且云當吳玠此時鳳翔以東俱爲金有岐之箭括非所攻之地今考通鑑蜀將陳彥威事胡氏注引杜佑曰岐山卽今之岐山縣其山兩岐故俗呼

爲箭筈嶺而通鑑輯覽注則云在今陝西鳳翔府汧陽縣南舊置關於此於吳玠事則注云卽箭括嶺岐山最高處在鳳翔府岐山縣東北是岐汧二縣皆有箭筈嶺皆曾置關與舊說不合而讀史方輿記要則兩載於岐汧二縣而於汧亦不以爲箭筈谷况玠自富平敗後方至和尚原鳳翔以東亦未必遽爲金有今仍過而存之以闕所疑

國朝

嘉慶初白蓮教匪由斜峪關出尋從郿竄去

同治元年八月鳳翔回匪叛亂二年四月周公廟暨諸廟被焚大肆殺掠

六年回匪崔三率衆犯境語在政績錄郭昌時傳中

岐山縣鄉土志卷之二

耆舊錄

岐山人物之盛莫如周室父子兄弟祖孫賢聖一堂上下千古惟堯之兄弟足以並駕下此莫與京也其中如泰伯之讓文王之忠孔子稱爲至德爲天下萬世之師法豈惟可以感勸岐人哉秦漢而後寂然無聞豈山川之靈秀已盡洩於成周乎抑碩德偉人代固不乏而未登顯仕著竹帛邑乘之缺有間歟今考史傳於唐得數人而庸行之可述者則自明始周室人才詩書備矣而事愈近則感勸愈切法得書者今皆志之若夫烈女節婦雖不可以耆舊稱而風化所係例得附列其無實跡可書而邑志已載其名者則不登

唐

劉感武德初以驃騎將軍戍涇州爲薛仁杲所圍糧盡殺所乘馬啖士而煮骨自飲至和木屑以食城垂陷長平王叔良救之賊乃解與叔良出戰爲賊執還圍涇

州令感約城中降感給諾至城下大呼曰賊大饑亡在朝暮秦王數十萬衆且至  
勉之無苦仁杲怒執感埋其半土中馳射之至死詈益甚今祀鄉賢 詳見唐書列傳

李淳風貞觀中爲太使令深通步天歷算多所撰述今祀鄉賢 詳見唐書列傳

和逢堯 見唐書列傳

張知謩字匪躬以明經高第歷十一州刺史所蒞有威嚴武后降璽書存問中宗  
在房州禁察苛嚴知謩爲刺史供億保戴不少弛開元時卒 詳見唐書列傳

明

胡貞由洪武時舉人任永和令永和素荒殘貞買牛種治耕具教民樹藝後擢知  
應州改廣德俱有循聲

張恪讀書一過終身不忘舉永樂甲午鄉試第一人歷官臨淄訓導睢陳潼川三  
州學正所至造士有法學者宗之

李善字元吉正統己未進士知黎城縣黜嚴峻尙寬平陞汾州知州多善政民間  
有清廉之頌三載陞正定知府時門役有董繼漢者資稟異常善以爲才令與其

子共讀卒登甲第善官至四川參政乞病歸居家孝友宗黨無聞焉

梁禧正統五年歲大饑斗粟千錢禧出粟五百石助賑當事聞其事於朝上義之賜以官辭曰吾民也如受官不幾以粟易官乎乃勅賜曰義民

郭宗舜正統時諸生有膽略涉獵書史切於民瘼時有羣盜聚劫遠近諸司傳檄襲捕不得宗舜計擒之有司上其事授巡檢後歲凶詔求直言宗舜伏闕上十事極論時弊指斥權要未復繫之以詩英宗採行焉授任潮縣巡檢會御史楊綱夜經其處宗舜盤詰如法綱怒劾以輕侮風憲宗舜以抗章辨奏上直之及土木之變入塞省候進衣物論功陞都督僉事

楊恭字克敬幼孤鞠於舅氏性穎異讀書日記數千言比壯益明經術登天順甲申進士歷官通政司右通政奉勅督理河道時運河潰決同平江伯陳瑄贊畫修理明年底績成化末關中大饑岐人多往任就食恭捐俸易粟以餽養歸途猶有贈遺又遣人持俸金歸里以賑貧乏所活數百人致士歸每歲種瓜以濟夏日行人遠近親疏咸感之今祀鄉賢

李俊字子英少孤無兄弟安貧力學事孀母樵採易粟寒暑不懈成化己丑進士  
除吏科給事中屢遷都給事中嘗言事置樸櫬以待後出爲湖廣參議宏治中屢  
官山西參政歸後囊篋蕭索晏如也今祀鄉賢 詳見明史傳例

陳倫年十七父官穎上適有疾倫聞之徒步往省視湯藥祈天願以身代及卒扶  
柩歸途行至三千里足指破爛未嘗乘騎後登成化乙未進士歷官長蘆運使貨  
賄常例一切罷革餘緡悉以輸官致政歸囊無長物怡然自樂性方嚴平居無一  
戲言治家內外肅然人多敬之

宋德成化乙未進士初任溫縣知縣法度嚴明宅心仁恕擢浙江道御史遷四川  
僉事副使剛明果斷清介有守故人稱之曰作令定溫鞏之田巡按洗焚死之冤  
持憲靖王剛之亂蓋宦績之表著者

楊武字宗文宏治丙辰進士知淄川縣鋤惡弭盜課耕織積倉粟拓學規興詩書  
賑貧乏疏淄河灌田利賴甚溥召拜監察御史按河南正德初按順天諸郡縣時  
劉瑾用事事多牽制武通達下情宣布朝廷德意一切敷陳無所顧避擢大理寺



左寺丞勸視大同邊務彈劾屯田不均軍役耗損諸弊政不少貸超拜左僉都御史巡撫宣府罷歸武高才多學善晉人書古文歌詩有文集法帖藏於家

孟醇由舉人任良鄉知縣振舉衰敝訟理政平擢御史有劉瑾黨魏斌亂鹽法醇以成憲折之斌懾服陞成都知府駱胡盜起醇殄其渠魁散其餘黨陞參政丁內艱不復仕日與田夫野老叙禮敦俗優游二十餘年人無大小接與甚溫聞人言是非微笑不與辨鄉人稱爲長者

張瑗由嘉靖辛卯舉人任沙河知縣博辦英發出語驚人見人善極口稱揚虛己以從值境內多故瑗日夜憂惶勤於部署百姓卒賴以安然體素清癯因勞致疾卒人多以未究厥施惜之

徐衡字大經幼聰穎博覽羣書尤潛心正學事父母能得歡心親疾嘗呼天請代族兄仁病革託寄百金撫孤及成立衡仍以原金付之由嘉靖庚子舉人知高唐州以清介自持歲大旱禱雨輒應又捐俸賑饑活數千人值漕河汎溢運航多阻衡督民分渠以殺水勢夜宿河涯凡三越月而漕運以通繼知應州勤於民事日

夜不遑因勞致疾乞歸居家課後進睦宗族鄉人有喪不能葬疾不能療者輒以資藥相贍人皆德之所著有輿山詩義今祀鄉賢子明萬歷壬午舉人登乙未進士歷知聞喜確山諸縣擢刑部主事亦有循聲

楊楠字伯直性至孝廉正不喜浮華潛心理學嘉靖壬子舉人父宦秦藩病篤楠省視徒步扶輿而歸足指血出躬耕養親父卒哀毀盡禮屢試春闈不第謁選得陽曲教諭明正學以教士士皆宗之會纂修世廟實錄成陞霍山知縣居官廉潔均田賦抑豪強築城墉以防外患勤苦備至時倭寇自九江入境勢甚猖獗楠倡義勇冒矢石擒數十人餘皆遁去事聞欽賞白金一鎰官霍三年以老母不能迎養遂告歸行李蕭然一如寒士母病篤祈以身代侍湯藥衣不解帶者三月母卒號痛幾絕飲食俱廢以毀卒聞者皆爲流涕所著有岐麓文集今祀鄉賢

梁豎素性正直嘉靖十三年佐主簿侯儒均平地糧公正無私舉爲義民

劉鳳岐嘉靖中任巡檢生而父母早亡祖母李氏育之成立鳳岐事李曲盡孝道李有疾必籲天祈代李年八十卒葬南山下鳳岐廬墓側負土成墳雖風雨深夜

虎狼出沒俱不避有雉兔馴集之異有女病革家人迫勸歸視鳳岐跑告墓側不忍離去女死得甦後鳳岐夢李運水來家次日鄰舍火延至鳳岐舍風反火息人以爲純孝所感當事者匾其門曰孝孫之第

楊紹程萬歷丙子舉人時岐俗膺鄉薦者例得派里人助粟百石紹程獨卻之皆知紹程非志溫飽者癸未成進士改翰林庶吉士尋授河南道監察御史凡疏奏皆人所憚言有郊廟不親朝講不御儲貳不建匹嫡當辦之語巡按滇南嘗疏沐舍人僭侈平鄧子龍之騰躁又嘗參政晉藩答逐權要雖直道招忌不悔也紹程工詩文尙氣節歸休後修邑中泰伯廟及仲雍祠倡旌李烈女小園皆事關風化者所著有館課宏詞詩文集今祀鄉賢

曹暹萬歷己酉舉人登天啓壬戌進士任猗氏知縣有德政人咸感之巡按江淮振厲風采肅清僚吏尋參議異甯平晉藩之亂釋沈寃及告歸寇攻岐城暹出夙養壯丁守禦賊驚潰城賴以全有李樹聲者鄉舉同年筮仕同縣廉靜不擾有德及人丁內艱不復仕闖逆之亂徵之使仕樹聲曰吾家六世受國恩今安往乎卽

夕呼天而逝

梁建廷萬歷乙卯舉人登丙辰進士官大理寺寺正多所平反主考四川出守河南廉明仁恕嘗請旨賜程邵二賢後裔爲博士俾供祭祀士論歸美歷山東兗東副使川南兵巡道湖廣布政使引疾歸值流賊猖獗養義兵以保護岐邑人立祠以報今祀鄉賢

李春華萬歷乙卯舉人矢志清修琴書自怡及知無爲州甫二載八院交牘薦之母病官邸扶輿歸殫力奉養居鄉油油偕處遠近咸重其品

李存邑庠生善事孀母萬歷間歲饑遵母命出粟千石活者甚衆邑令表爲岐周義士

張國治天啓甲子舉人孝友清介家徒四壁知獲嘉縣撫字子遺爲饑民請蠲遂失上意掛官歸民皆感德

范章邑庠生性方正孝友每出行不由逕人笑之卒不改居母喪痛不欲生咽麥麩而活者四十餘日旣塋絕酒肉三年奉祀神主一如親在時每食必獻出入必

告終身如一天啓中流寇之亂當逃避悲其姊孀居乃負甥偕二子以行子與寇  
值皆遇害章負甥逃遁甥免而章遂無嗣里人哀而稱之曰鄧伯道旣歿其甥家  
世爲拜掃焉

王髦士貢生博學能詩侍母癯疾曲盡子道母歿廬墓盡哀學使以敦孝明經贈  
之

王進收生於天啓五年家甚貧甫成童父死母改適他姓於連雲棧進收不知其  
處凡二十年遍訪之每與人言輒流涕沾襟不能已卒知母所進收星馳往見傷  
心悲痛觀者皆爲泣下居數月他姓亦亡且無子進收營塋畢卽以竹篋負母歸  
採薪以養母疾求藥禱神願以身代歿亦守墓焉

武全性孝友事繼母得其歡心兄弟中有拂母意者全跪謝母悅始已於是兄弟  
皆以孝讓相勸由歲貢任荆門同知居官十年廉勤小心愛民如子致仕歸清淡  
自守處鄉里無僞言飾行人多稱之

羅佑少孤貧善事孀母秉性方正由歲貢尹甯陽政教以德行爲先有餽斗金求

免罪者佑郤之會權要脇以賄卽浩然歸里直道而行邑人至今稱之

曹希夔博涉經史時稱武庫器局風節有萬夫之望由選貢任西安府訓導德造  
作人稱極盛焉今祀鄉賢

李苾剛方正直勤學工文每試輒冠其軍由選貢任郟陽教諭課士有方一時英  
異皆出其門今祀鄉賢

李聯芳由選貢任莘縣知縣刑清訟簡境內以安及乞歸淡泊自治不干外事

梁渭貢生少負時名議論今古娓娓不倦質疑者無虛日門內雍睦清修自好傳  
所謂君子儒者歟今祀鄉賢

牛養傑博綜羣書秉性方正事繼母能孝由選貢知延津縣坐剛直免闖逆之變  
衣冠向闕北拜罵賊而死

李茂林郡庠生事親孝取與義學問淵博士人宗之從祀鄉賢

張明盛邑庠生端方守己以禮事親邑令嘗舉其孝

藺愛歲貢生痛父早亡事母曲盡子職上憲以孝行表其門

張邦猷邑學生家貧苦志不苟干謁孝友誠實鄉人化之巡按溫有甘貧苦學守正不阿之譽

李葵賈人也嘗與客易薑黃一篋客亡其篋內藏金及覺走問葵全歸之縣令聞而表其門

梁體恭邑庠生父選廷嘗置義塚地體恭力承父行學使舉爲優生

國朝

李居一字不二一字數奇由增生隨肅王平蜀授巴縣知縣招集散亡愛養殘黎巴人爲立生祠繼知邵武薄差徭知霍山振士風民亦建生祠歷知慶雲縣陞六安州及臨江司馬遷沅江及東川知府東川值吳逆之亂城邑空虛居一苦心綏撫不敢安居尋以政績擢四川川東道未抵任卒子邵生字偉人由例貢知衡陽縣亦有政聲所著有蜀遊草等集

李爭豔幼失恃事繼母史以孝聞年十五就傅尋以親老遂力耕以養父歿葬祭以禮疏食三年而事繼母益謹康熙三十年歲饑嘗負米陰平武都以供朝夕繼

又以奉養無資囑季子視晨昏而身與長子炳生販米漢中居未久思母欲歸至於流涕時僅積米三斗遂負歸養然困苦中必督其子炳生力學以顯親炳生等康熙乙酉賢書爭豔曰吾父雖未目覩可以慰父在天之靈亦可慰吾母撫育之心矣又五年疾將不起謂炳生曰吾不能終養罪人也我死歛毋用寸帛後以子貴贈文林郎入忠孝祠炳生字耀如性方正自爲童子已若成人方客漢中時知父志在顯親而不遂也卽力學以承父志旣舉於鄉旋知慶雲縣蒞任時水旱頻仍炳生請賑祈禱無虛日振作斯文邑之登科第者咸感焉三載政簡刑清以忤當事意改教諭去之日百姓爭餽薪米遠送泣餞補渭南教諭陞鞏昌教授年八十告歸同僚作詩以送學使亦有方正不阿之譽云

何漢字海若歲貢生幼失恃事父以孝聞父歿廬墓三載鄉黨重其行康熙五十八年雍正五年再舉孝廉後司訓洛川一以處家者教士洛川有得師之慶

雒兼善邑庠生父泰皋嘗服賈雅州吳逆之亂兼善年十四聞之恐父不測痛哭徹晝夜髮爲半白欲馳視隣人程宗儒憐其幼弱遂輔以行適其父歸至鳳縣柴



關嶺遇焉抵家依依膝下不忍一刻離父教之曰吾家事業儒若欲慰吾志必力學以繼家聲晨昏定省之節其小者也兼善卽就傅力學越明年入泮後父患痰疾兼善奉侍湯藥衣不解帶者三年父卒哀毀骨立喪葬以禮歲時必哭奠主前母侯氏亦老且齒落每食頗艱兼善必親調羹食以進母不飽亦不忍食如是者凡二載而母齒重生人皆謂孝所致也母卒哀毀如父喪而朝夕泣奠則終身無異云入忠孝祠子珂增廣生亦善事其親

侯秉璧三歲喪母侍繼母劉疾三年衣不解帶醫有居麟遊者秉璧將爲母延之或告以虎踞其途秉璧不懼往則與虎遇卒亦不傷時值冬寒醫謂須桑蟲療疾秉璧忍凍覓之落其指節母歿哀痛至七日不食入忠孝祠

梁必逢字書升父早逝事母能得歡心兄弟之間怡怡如也母歿三年不入室爲諸生時居土室中力學右臂遂以病溼廢乃習左手書以應試登乾隆壬午賢書爲長武訓導卒於官士咸惜之

陳良貴邑庠生事繼母亦孝聞母疾謹侍湯藥衣不解帶母歿三年不食肉飲酒

待異母弟終身友愛里人謂有古孝子之風焉

王特恩父患痿痺特恩作小車身輓以行父疾劇嘗糞以驗吉凶及卒刻木爲像朝夕哭奠兄子青選早孤督之力學曰吾不能顯揚父母將賴此子也旣卒青選哭泣盡哀如喪其父祭葬以禮後由廩生爲歲貢一門叔姪篤於倫常鄉里稱頌焉

武永清爲人方正父母早亡事兄如事親以貧故爲商文縣有餘資則徒步歸視其兄贍衣食焉後卒於文文人義其敬兄也櫬歸時泣而送者甚衆

郭玳幼貧與兄玳力農服賈而玳尤善治生數十年積資鉅萬事兄每事慰其心兄子五人玳子二人嘗語玳曰世人執房分之說以分資均於其身而不能均於子姪猶弗均也且孰非郭氏子哉賴先人餘蔭豐衣足食兄百年後子姪或不欲同爨當以人爲例勿拘房分也兄歿分資卒如其言邑人爲富家長厚無若玳者後玳子千祥官安慶通判

崔永齡乾隆辛酉舉人以知縣借補浙江鳴鶴場鹽運分司著有管中錄山左進

士王夔村叙之曰自橫渠講學關中代有傳人是錄本躬行心得發爲見道之言真不愧爲關學其述作見重於人如此孫平瑞號珠巖道光戊寅舉人著有漁山閣詩文醞釀深厚有乃祖風公車四上道卒潼關人多惜之

武達觀號周原由優貢中乾隆壬午順天舉人知高縣以金川軍務勞績調武安清操亮節遇事有爲在武安修學宮葺城垣增書院膏火築山水堰隄調衛郡首縣因疾告歸處鄉黨恂恂人無閒言初鳳郡人試春闈僦屋而居達觀創建鳳翔會館公車便之迨其卒也武安士民不遠千里來弔祀武安名宦本邑鄉賢子肅挺衛自有傳

牛遂良歲貢生敦實行通經史雖燕閒居處必整衣冠以經藝啓迪後進至老不倦學者咸敬重之

武肅字敬伯由大學生考補方略館校錄議叙布經歷分發河南初任禹州州判歷新鄭偃師知縣其判禹州也有兄弟爭田者婉勸之感服而去任新鄭有巨猾某曉以大義立改前非爲偃師除差徭浮費歲省萬金立徵收錢糧法吏胥不敢

變更歲饑請緩徵捐米賑濟陞鄭州如治偃師生平居官仁明勤儉嘗拓鳳翔會館以繼父志可謂父作子述者矣偃師祀名宦祠

武挺號柱山廩貢生嘉慶間岐邑差徭累民挺會諸紳耆稟官創立差局按糧派錢凡事節省數年之間所派益少而餘錢萬緡欲籌欸生息永不派錢爲久遠計乃當事者更張虛糜未竟其志識者惜之子念祖知上元等縣有政聲孫澄道光庚子舉人品端學博行爲不苟主講鳳鳴書院本邑人主講者自澄始邑人士從學者甚衆著有見所未見錄等集訪巖咸豐辛亥舉人四川蒲江知縣

武衛號小原少失怙事母孝事兄恭由太學生歷官歸德南康通判陞上思州知州咸豐五年髮逆陷州城衛視妻梁氏妾馬氏子錫祚皆縊死衣冠升堂罵賊賊以其循良不忍傷遂自經賊救之復甦乃以賊情密聞上憲不食而卒僕廣西李玉陝西楊升皆爲傷害一門忠義有足風焉

梁星源字石泉嘉慶丙子舉人大挑分發廣東歷知鶴山新安縣新安無差局適有夷務兵差絡繹諸軍不遂苛求乃以抗差誣聞中丞林文忠公則徐委查知情

且諗其日夜巡防與民共甘苦遂心識之丁艱服闋後復任新安文忠總制兩廣保調南海新安士民遮道跪留賦詩成帙爲蓮城輿誦集先是南海有盜殺茶商行店一家獨安徽茶客一人店戶女主一人存已經定案星源察情未確稟請覆訊隨獲盜犯供實茶客女主寃得雪英夷蠢動海道賊因先爲亂梁深恩者應死盜魁也曉以大義矢以不死梁感激力捕清海道赦罪優賞由是以海防得法賞藍翎又換花翎陞嘉應州改陞四川順慶府復陞廣東南韶道遇水災捐廉籌賑民無失所署按察使秋審詳察案情至徹夜不寐恐有寃者旋授雲南按察使時粵西逆匪作亂竄擾湖南 朝廷以星源在粵東多年深悉粵逆情形且辦防有法將倚爲重藩特授湖北布政使咸豐元年 陛見請 訓抵任卽籌餉議防察吏安民粵匪逼近省城又令長子兆慶守漢陽門因防兵太少援兵不至賊遠挖地道陷城詈罵遇害長子亦殉焉三年蒙卹襲職 賜諡敏肅 勅祀昭忠祠建祠立坊 頒賜祭文忠貞大節 天恩亦云渥已

龐步瀛邑武生天性孝友事繼母甚得歡心處昆仲無微嫌嘉慶初白蓮教匪出

斜谷將偷過渭河奉邑令諭率鄉勇防堵北原事平辭勞績不受議叙弟赴瀛廩貢生任渭南訓導陞整屋教諭後陞西安府學教授歷任課士以敦倫爲先誘掖獎勸不遺餘力

蕭漢輔增廣生繼母皇甫臥病三年衣服飲食動必需人漢輔委婉奉事略無懈怠嘉慶七年荒旱人有餓死者母命漢輔貸錢百緡以濟貧乏卒無德色母之賢與漢輔之孝皆可見矣

武錫廣字藹堂道光乙酉拔貢由教職改四川石泉縣知縣不事姑息境內乂安調補南充陞雷波通判南充爲順慶首邑兵差浩繁設法支應而民不累滇匪犯界捐廉籌款修城鑄礮賊圍郡城有備無患城賴以全廉幹有威而性慈祥民非大違法不忍加重刑每去一邑百姓咸思慕焉子正佑選四川高縣知縣回逆之亂郡守張留辦城防歷十六月積勞成疾卒

宋遇魁歲貢生品端學正不事浮夸教授生徒因材誘掖一時學者多出其門

王樹堂號亦山道光壬午舉人任咸甯教諭學識淵博沈靜寡言任滿當事欲薦

之力辭其淡泊如此教學者量材啓迪成就者甚衆著有硯雲亭詩文集

張正雅字西周篤信樸誠學求心得尤寢饋於古文張正春字泰三性聰敏而和平作文以雅正爲宗兼通醫理以濟人爲心胡步雲學行淵懿工書有求者必書先賢訓誡語與之子守經爲榆林訓導課士誠篤四人皆歲貢生

宋兌成號西山以廩貢選教職初署南鄭後授武功教諭所至均得士心致仕家居有貧士不能入塾者輒令就請家塾又於鄰村設立義學延師以教貧幼尤好義急公凡築城垣修道路增添書院膏火諸舉無不趨之恐後籌餉集團所捐尤多子金鑑字瑞卿天姿超邁十四歲入庠以優貢登道光庚戌進士授翰林院庶吉士丁母憂回籍泣語人曰人矢志功名以顯親耳今若此胡以功名爲服闋改內閣中書選刑部郎中俸滿截取知府遂解官歸養同治元年回逆之變見邑令願毀家爲防守計卒以衆議不合憂憤成疾卒

王楷字範之歲貢生天性直率文理清雅鄉中老幼望之肅然起敬集生徒講解經義成就多人

王自凝從九品啓疆字熙臣自凝之季弟也啓疆幼自凝嘗督之力學遂以道光乙酉舉人由禮縣訓導保舉知縣分發直隸任寶坻有廿年爭葺之獄立爲判決人胥敬服任保定值旱蝗禱捕救恤活民無算任東安髮逆犯境設法防堵晉知州銜旋任三河時初行大錢以不便民爲請被議去之日送者塞路同治元年復用爲高邑知縣政平訟理卒於官自凝之初就傅也聞義氣事卽知慕之後因親老習賈於南山南山自其父時多負債者嘉慶初白蓮教匪平自凝悉召負債者謂曰今遭劫生且難保安言債悉出簿券焚之而貲反日以愈厚弟自強爲叔父後體父意予家貲五分之一親鄰不能婚葬輒量事仗助遇鄉里爭端剖決是非辭不少假睦嫻任恤老而彌篤友人嘗贈顯曰質直好義蓋紀實也年逾五十始生子人以爲孝友之報云

魏佐清歲貢生學深養粹舉止端方生平未嘗見怒容鄉人敬而愛之

郭命錫字捷三附貢生歷署鳳州潁州安慶等處同知賦性剛毅不苟言笑隨處有循聲人莫干以私歷任十餘年致仕歸惟書數篋衣數襲而已子圻字純一自



海疆軍務迄咸豐間屢捐巨款家因式微毫無吝色孫箴亦能承父志出貲施粥募勇守城焉

郭堃號厚齋以布政司經歷候補四川當事器之聞母疾星夜旋里遂絕意仕進以養母孝行克稱子鎮當回逆亂時出貲籌餉集團練築城垣無不踴躍從事焉郭勳字放叔由廩貢援例爲洧川知縣洧川土瘠民貧一切陋規悉裁之值饑饉竭力辦賑民無流離徵收錢糧汰革新增耗費率由舊章與民休息政簡刑清囹圄空虛洧川舊無書院勳捐廉荆建籌修金膏火延師教士士風日起以母老告歸時與父老言往事粥粥若無能者子樞廩貢生候選主事遇捐餉修城賑濟城防累捐巨款慷慨不吝有父風焉

郭愷候選布經歷事親無忝友愛性成弟早逝撫遺孤教養備至無異己出道光乙未丙申歲荒捐金施粟幫辦賑濟凡海疆捐輸修城籌餉無不竭力倡捐其生平之急公如此

李建灃武生天性純厚篤於事親母歿負土營墓三載成墳家故不豐然遇人有

急輒分所有以周之其好義任恤類如此

楊際清號虎溪道光乙未舉人博通經史文詞清麗教授生徒各因其質一時多所成就

李正明字貞心歲貢生少失怙事母能得歡心天姿過人文有奇氣性戇直排解紛難人皆敬服故其鄉鄰鮮訟獄者篤交遊有友某將亡託以二子力任之以女許字其次子後終培植成立

羅映西邑增生子士英崇禮士鑣皆拔貢崇禮復中道光丙午舉人父子四人復以文學稱

牛炳禮歲貢生學問純正事母孝兄貿易遠方病歿家貧徒步扶柩歸葬焉

楊秉乾邑廩生事繼母曲得歡心母年逾七旬患風痰起居飲食必躬親及母歿哀痛異常工駢體文所教成就甚多居鄉讜論正言人多畏敬之

劉錫儒號月川道光癸卯副貢幼貧晝耕夜讀接人甚和充里局首事立除苛派咸豐初督修城垣甚勤敏焉

龐大鵬道光庚子武舉以城防議叙守備性孝友年五十事母猶作孺子慕兄主家政凡事必稟而行語言直爽作事必實咸豐初督修城垣築者無敢作僞又有王蓋臣者字誠齋由廩貢爲興平訓導亦與修城事一時經營多經其手云

孟煥咸豐乙卯舉人篤信謹守好學不倦著作甚多能爲駢體文

康縉號芝山咸豐己未進士官戶部主事天姿敦厚語質而遲人咸重之篤於親族嘗以覃恩貤封其堂叔某卒於官子爾田咸豐辛酉拔貢

宋炳麟號文圃由庠生報捐同知幼失怙恃兄嫂撫之成立兄嫂歿諸事皆盡禮以報處骨肉無間言道光間歲屢饑施麵施錢以賑所捐尤多凡義舉未嘗慳吝子金綬侯選訓導性豪爽財好義恤寒士有贈至一二百金者立義學惜字會累年不倦修城辦團籌防無不樂輸又廣交遊父喪數郡畢至人謂有杜季良之風

李東蔚字文軒嗜讀書至老不倦擇師課子事親以孝聞里中無以爲葬者捐義地以葬之戚族貧者助棺木使葬也地子鼎元友棠皆舉人兩孫亦早遊庠人以

爲好學行善之報

李佐朝邑庠生天性篤摯心地肫誠矢志力學苦心研究母老目盲躬侍起居依儒慕人稱孝焉

宋繩祖例貢生究心經史尤精岐黃家業素封不吝周恤里人感焉

曹達善兄明善歿生子未彌月撫之至成立孀嫂任氏守節年逾七旬敬禮不衰其恭兄有足風矣

程道宗歲貢生端行止慎交遊淡泊寡營好學不倦生平無疾言遽色年逾七十猶日誦詩風有古儒者之風

自回捻髮逆之亂邑之帶勇守關集團堵賊賊執不屈者死亡不可勝計邑志所載約數百人今取有事蹟者節書之

常天植從九品同治六年捻逆之亂被執不屈爲賊所傷弟天申邑廩生見兄死奪刀欲殺賊賊怒亦殺之天申子鐸痛父及伯被害罵賊賊又殺之父子兄弟義氣萃於一門矣

王際甲邑庠生品行端正家寒素讀書至老不倦捻逆之亂二子遇害罵賊而死楊盤珠以咸豐壬子武舉爲漢中守備同治元年鳳回亂邑令鄜豫留辦城防帶勇三百餘人禦賊於佛指溝後退屯西關至十月東西回同至盤珠率勇堵禦中礮而亡弟廩生聯珠同時戰歿

婦女之節烈者邑志所載不下六七百人有略書事蹟者有絕無事蹟者至行感人固不存乎記述之詳略今援明史例約舉其事蹟之足感泣者節錄之以爲轉移風化之助其餘則邑乘已載其芳徽節義祠又隆其禋祀不復詳紀云

明

李小園李若梓女七歲許字王邦甯及笄未嫁忽一夕夢月折爲二以夢不祥告母次日聞邦甯自縊訃小園以己字邦甯卽宜爲王氏鬼白其父母欲親往弔然未以死告也比至柩所一慟而絕母姑急救得甦母勸其歸女曰兒至此豈復歸乎旣以身許人得死爲幸良負母因向翁姑泣拜曰今失所天未能奉侍二老必須成婦禮然後可從夫地下遂入廚爲粥奉翁姑至晚婉慰姑及母寢詣喪次夜

深自盡家人尙未覺忽大雷震電屋瓦皆裂驚起視之小園已死將斂面色如生時萬歷乙巳三月十一日也狀聞勅建烈女祠樹坊旌表士大夫多題詠其事者梁珊如浙江石門梁大業之女也大業携眷遊幕於岐字女於岐令單世賞未浹辰而變作闖逆之入西安也獨鳳翔不下女謂其父曰吾觀岐民識大義非能反顏從賊者若練義兵使自固以守其必濟說於令不果行及難作大業遇害時珊如年十六丰儀端雅寇酋欲亂之珊如卒蓄利刃自衛威逼不從囚之樓中女自搥其喉賊覺而奪之令二寇守勸珊如飲啜不入口者且三日忽笑而給賊以願從二寇欣去報酋珊如卽觸樓壁而死死之日色洋洋如平時天晦地霾蓋慘烈之氣所感云

### 國朝

張氏王元妻年十九元亡旣塋氏痛哭數日自盡於墓側以殉時康熙十三年也鄉里哀之匾其門曰節烈完人

梁氏龐紹統妻明季遭賊亂紹統被害氏年十九誓不辱遂投井然未及滅頂賊

去鄰人收紹統屍聞其聲而出之矢志撫孤苦節終身康熙時邑令茹公憐其苦  
優免丁徭

楊氏徐必運妻年十九夫亡翁姑憫其年少諭以他適氏日蓬頭垢面以示不從  
既而翁姑且勸之氏曰媳在卽子在也因斷髮自矢以事翁姑屢遭凶歲糟糠度  
日而志卒不改

朱氏蘇元妻年十九夫亡子湖英甫五月有謀嫁之者氏聞之卽斷髮毀面以利  
刃自隨紡織事翁及子入庠而氏以中年積苦雙目失明鄉里傷之

李氏曹恩妻年十九夫亡無子氏卽欲自盡家人防之密遂不食數日而死

張氏陳廣祚妻年二十一夫亡姑患目疾服藥不效醫言舌舐可有功氏遂潔其  
舌以舐之數十日而姑目愈鄰人有憐其苦者勸以他適氏引斧斷指以自誓守  
節四十三年終

李氏樊起元妻十九歲夫亡子甫一歲家貧親老又值歲飢氏鬻釵珥以供朝夕  
姑尋患癱氏侍飲食起居備嘗辛苦壽七十終

劉氏王焜妻二十一歲夫亡繼姑杜氏逼之改適氏不從因嚙指出血以自誓而杜益嫉逼愈甚多方苦之至冬不得衣敗絮氏衣單抱子臥冷室中卒無怨言賴杜之二子竊給衣食以全氏志守節四十五年終

王氏趙方諱妻年十九夫亡子積德甫兩月家極貧氏將以死殉翁止之曰趙氏僅一孤汝死誰依耶氏從之撫積德成立娶鄭氏生子永康而積德早亡鄭年二十一亦矢志守節與姑同撫永康艱難萬狀母家勸鄭改適鄭抱永康日夜哭泣淚盡血出遂失明里人哀之

白氏張梅繼妻蘇氏梅弟超妻蘇先孀居歷一載白亦寡蘇年二十七子七歲白年二十一前妻子八歲蘇謂白曰嫂年少無出盍行乎白曰婦人守節爲有子耶抑更有爲耶况前男八歲豈非吾子且舅年老不忍有他說與蘇共誓苦節各四十餘年

曹氏劉丁熊妻夫亡子幼家貧無依有勸其携子而嫁者氏痛哭不言遂自縊其嫂覺急救得甦氏乃剪髮自誓甘貧撫孤以續夫嗣備嘗艱苦四十八年



魏氏易巽妻夫亡二子俱幼氏甘貧撫孤值歲飢鄰人有憐其貧者給米數升氏反米茹菜不受人憐守節三十五年終

張氏王敬泰妻十三歲許字未嫁而敬泰啞父母欲改字他姓氏不可卒歸之孝養翁姑善事其夫邑令匾其門

畢久存幼字李茂江未嫁而茂江亡久存聞訃卽痛絕祖母救甦欲親往奠不果遂絕飲食日恒慟哭旣懇其伯邀翁至跪稟曰薄命媳生不能爲翁媳死得與翁子同穴足矣自此不食而卒翁嘉其志昇歸合葬焉

馬氏龐敬妻安西州人也敬商於安西娶氏生一子氏年二十敬病篤將亡謂氏曰予先人墳墓在岐山我死後汝能携子歸故土守先人墳墓使不絕香火我瞑目矣氏遵遺命殮葬後携子旋歸途中備嘗辛苦歸家後撫子成立念夫骨在外常痛哭每逢節序必望西致奠克全義節

唐氏梁氏皆郭蘭畹之妾也蘭畹亡唐年二十二梁年二十一經營殯殮皆如禮送塋詣墳卽欲撲穴以殉親眷阻之不果歸家後俟夜深人寂二氏均自縊盡節

已蒙旌獎

張氏馬從龍妻年二十七夫亡無子僅遺二女姑與其子婦三人以氏爲奇貨日夜逼使改適氏不從遂絕其飲食且誣以曖昧氏忍辱受飢矢志愈堅又於夜間驚雞使鳴氏閉門伴女靜坐自是三人無隙可乘謀亦稍懈氏乃撫姪以續夫嗣守節五十五年至八十二歲卒

墨氏郭坎娃妻回逆之亂乘馬同夫避難途見賊近氏以馬授夫使速奔比賊來故與之語俟夫去遠始厲聲罵賊賊怒并其子殺之後數日衆人殮屍猶抱子危坐路傍又有呂氏者張德明妻捻賊亂避居高窰窰陷賊殺其夫欲擄氏去氏語賊曰能放我姑及子姪出始肯從賊依其言俱釋之及擄氏氏乃罵賊賊舉火焚死又蔡蒲芳者蔡自強女年十六已字而猶未嫁也被回逆強扶馬上數次女不從罵不絕口賊反縛其手以背負之女口齧賊耳至墮賊怒支解之髮捻回逆之亂婦女慷慨就義視死如歸者衆矣存三人可以例其餘云

岐山縣鄉土志卷之三

人類

岐地當同治以前人類惟有回民秦中東至同華西極沙漠種頗繁滋非僅岐山爲然也自經煽亂虔劉遷徙蕩然無存矣今所存者餅家小販三數人而已時去時來不著籍無戶口可稽焉

戶口

地利之興衰視乎人民之多寡編審不可以不詳也志戶口岐非駐防地故無旗戶云

乾隆四十八年以前有口而無戶五十年戶二萬八十五口十一萬三千四百六十一至咸豐十一年戶二萬六千八百二十三男口十萬二千一百三十八女口八萬二千三百九十七視乾隆五十年增戶六千七百三十八增口七萬一千七十四至光緒元年戶二萬七千二百一十二男口八萬一千二百八十八女口六

萬八千一百五十八視咸豐元年增戶三百八十九減口三萬五千八十九光緒三十一年戶一萬九千五百一男口七萬七千六百六女口六萬五千六百八十攷岐之戶口至咸豐間而繁衍已極厥後回逆倡亂髮捻疊擾死亡流散戶口遂減又屢遭荒札息養爲難蓋至今而瘡痍尙未盡復焉

### 氏族

上古天子諸侯乃有姓士大夫之族則皆氏也三代而下姓氏遂無區別自晉氏南遷最重氏族中原之著姓已多自北而南元魏興於北方至孝文改姓而後有唐一代中原之名門半出拓跋而華族之存者更無幾矣故論氏族者自海內數十著姓外其餘皆當就近代而稽之博辦如鄭樵之氏族略亦多附會而未可盡據而其他氏族之書可知矣岐地無世家大族譜牒漫無可稽卽間有搢紳之家亦多暴貴於一時無從追溯其原本此氏族之不可考者一回亂以後民間譜牒十不存一間有存者不過紀昭穆之序書祖考之名絕無能言其受氏之由詳溯其遷居之始者此氏族之不可考者二今於邑姓之稍著者約略採取其傳代之

不可知者仍闕之若夫摭拾姓譜之唾餘以影響爲穿鑿非心之所能安亦非義之所敢出也

李氏唐李洎風之後世居仁智里李家村

王氏始祖琳唐招討使勅賜定西侯世居潤德里岐周古寨

蔡氏始祖欽宋鳳翔府知府世居石樓里蔡家坡

張氏始祖璣明洪武間進士許州知州世居在城里傳十八代

武氏始祖效天明洪武時知縣原籍山西洪洞縣洪武時遷岐世居益店里傳十

### 九代

楊氏始祖恭明天順癸未進士見耆舊錄世居潤德里

宋氏始祖德明成化乙未進士見耆舊錄世居在城里

孟氏始祖醇明宏治乙卯舉人見耆舊錄世居潤德里孟家堡

梁氏始祖禧明正統間人見耆舊錄世居在城里

唐氏始祖祖昌原籍河南光山縣明末以軍功遷岐世居尙善里傳八代

段氏始祖廷福由晉遷岐世居在城里鳳凰村

薛氏始祖邦棟明末由晉遷岐世居潤德里松柏村傳八代

劉氏始祖漢渠明末遷岐世居景花里劉家原傳九代

### 宗教

中國古稱三教儒教而外釋道乃千百分之一耳自穆罕默德倡教於天方耶蘇創興於猶太乃有回教天主教耶蘇教而西域蒙古則又有喇嘛黃教紅教孔子曰有教無類教之多類蓋亦世變爲之也明末天主教已入中國然惟京師有堂尙未及於州縣自通商以來傳教者始多而岐地則近十數年來始有從其教者今各就其類而區別之爲宗教志

回教人無

喇嘛黃教紅教人無

天主教約二千五百餘人

耶蘇教約三十餘人

實業

民以食爲天以農爲本土工商皆仰給於農者也故民惟農爲最夥然以羨補不足則四者皆相用而不可相無焉岐地民俗尙樸儒風未暢地非衝要工商亦少三者纔得農十分之一耳其入他教者亦農爲多今查明實業各紀其數爲實業志

士約八百五十餘人

農約四萬五千二百餘人

工約一千四百八十餘人

商本境民在本境爲商者約九百三十餘人本境民在他邑爲商者約二百七十餘人他邑民在本境爲商者約七百四十餘人共約一千九百五十餘人

地理

古地理疏今地理密非第以考沿革矜博洽也行兵之要害田賦之鈎稽礦藏之有無漕運之通塞水利農田之講求郡縣都邑之分合皆將於是乎資焉今於城

治村堡之方向古蹟祠廟橋梁之建置山水之遠近大小皆詳爲攷之以備採擇  
志地理

岐山縣治在省城之正西三百一十里在府城之東南五十里東至扶風縣界三  
十五里西至鳳翔縣界八里南至佛坪廳界一百一十里北至麟遊縣界五十里  
東南至郿縣界四十里西南至寶雞縣界三十里東北至扶風縣界六十里西北  
至鳳翔縣界三十里縣境廣四十鳥里縱一百五十五鳥里

本境分里三十統村六百三十曰在城里附郭也統村二十其西曰潤德里統村  
十四又西北曰仁聖里統村十五其西北則麟遊鳳翔界也在城里之東北曰仁  
智里統村三十九其東北曰廣惠里統村二十六又東曰尙善里統村三十一又  
東曰通濟里統村一十七其北皆界麟遊此北鄉也通濟之東北曰仁岐里統村  
一十九又東曰青化里統村三十五又東北曰青樂里統村二十二以上三里其  
北東皆界扶風青樂之南曰益店里統村二十五益店之東北曰朝陽里統村二  
十六北界青樂東則扶風界也益店之東南曰維陽里統村一十九東南與扶風



爲界益店之西曰平原里統村二十一西接在城北則連通濟尙善廣惠矣此東鄉也平原之南西接在城曰義豐里統村二十一義豐之西北連在城曰興福里統村一十二興福之西南曰懷賢里統村二十六懷賢之東北連義豐東界扶風曰懷仁里統村四十一懷仁之南東界扶風郿縣曰馬磧里統村四十三馬磧之南東界郿南界佛坪曰落星里統村六落星之西南曰諸葛里統村八此南鄉也在城之南東連興福曰資福里統村一十八資福之西北連潤德曰景花里統村一十二其西南曰安化里統村一十二西南皆界寶雞資福之南曰石樓里統村一十九石樓里西南曰渭陽里統村一十八其西則安化也石樓之東曰通津里統村一十六其東則馬磧南則落星也石樓之南曰高店里統村一十九其東則落星南則諸葛也高店之西曰同峪里統村一十七北接渭陽安化西南則至寶雞界矣其南山之陽曰桃川里統村一十三東北連諸葛高店西北接同峪西南則極於寶雞之界而止此西鄉也

古蹟

岐陽宮卽太王遷岐所建也在仁岐里其地卽周原所建城卽周城也後周廢郿城置周城縣隋又改爲渭濱與此不同

周泰伯廟在縣西北十里仁聖里寇村今圯矣

召公亭在縣西南八里景花里召亭村召公奭之采邑也後人因建亭有甘棠樹水經注所謂樹亭川者卽指經此地之雍水也今亭圯而居人猶以名村云

石鼓相傳周宣王獵於岐陽勒石紀功形如鼓數有十唐時鄭餘慶於陳倉得其八置鳳翔學宮宋時向傅師復得其二大觀中置開封辟雍靖康之亂金人取歸燕京今列太學或有以爲後周物者莫得而詳也

卷阿卽詩所謂有卷者阿也在縣西北十五里仁聖里地有周公廟亦曰周公邱廟側有泉曰潤德泉

隋舊縣元和志後周天和四年割涇州鶡觚縣南界及雍之東界以岐之三龍山爲名置三龍縣本在漢雍縣地隋開皇十六年移三龍於岐山南十里更名岐山其地蓋在今之通濟里杜城上營諸村左右寰宇記大業九年又移於縣東北八

里岐山之麓卽今岐陽宮地

唐舊縣武德中移縣治於龍尾城蓋自岐陽移之也今龍尾坡東北五里有龍尾城故址

岐陽廢縣在縣東北五十里唐貞觀七年析扶風岐山二縣置以其地在岐山南周太王居岐之陽卽此處也二十一年縣廢永徽五年復置元和三年又廢宋爲岐陽鎮按此說本於讀史方輿紀要與新舊唐書地理志合而與邑志微有不同今闕所疑

懷賢閣漢丞相亮伐魏運米集斜谷口治斜谷邸閣後人因建此閣今無存落星灣在五丈原東麓按蜀志諸葛亮傳註有星赤而芒角自東北流西南投於亮營俄而亮卒卽此地

石佛像相傳唐天后避暑九成宮欲輦過岐山石險峻開鑿甚艱后怒殺工甚衆有二比丘杖錫來曰胡不煨以火油醋淬之試輒應知爲異人追及巘沒入土中惟笠復其處錫卓其傍掘之得二石佛像因建寺山下遇旱禱雨多應有人暗昇

一尊出關東今山上猶有笠錫蹟

周太王陵在岐陽宮周三王廟北

唐昌樂縣男李淳風墓在縣東五里墓旁有祠

祠廟

風雲雷雨山川壇在南門外

先農壇在東郭外大道北

社稷壇在城外西北隅

厲壇在社稷東百步

八蜡廟在山川壇左

城隍廟在縣署西北正街

文廟在南門內學署西

崇聖祠在文廟北

名宦祠在文廟戟門左

鄉賢祠在文廟戟門右

忠孝祠在學署儀門左

節義祠在學署儀門右

關帝廟在縣署北正街

文昌祠在城內正街

倉帝廟在縣西南四里資福里徐家堡東附近有墓居民指爲倉頡墓云

夏禹王廟在縣東北十三里

周太王廟在縣東北五十里通濟里邑人謂之岐陽宮以王季文王配享

周元公廟在卷阿鳳凰山之麓也以太公召公配享

姜嫄祠在周公殿後以太姜太任太姒邑姜配享

后稷祠在姜嫄祠後山坡上以泰伯仲雍王季配享

郊媒祠在姜嫄祠東

諸葛忠武侯祠在縣南五十里五丈原

右祠廟舉春秋奉祭在祀典者其民間自爲奉祀及二氏之寺觀且非名勝古蹟所存者皆不錄

坊表

三世大夫坊在城內西街爲明布政使梁建廷建

兩世御史坊在城內東街爲明御史曹暹建

烈女坊在城內太平寺門西爲明烈女李小園建

節孝總坊一在學署大門東一在學署大門西

昭忠崇祀坊在城內東街爲殉難湖北布政使梁星源建

橋梁

潤德橋在城北二里許因跨潤德泉水故名

魯班橋在縣東十五里

廣惠橋卽鄭家橋在縣東北十五里

南莊橋在縣東北三十里

北莊橋在縣東北三十五里

魯家橋在縣東北三十八里

濟險橋在縣東南八十里斜谷口山水洶湧屢修屢壞地爲秦蜀通衢行旅絡繹近谷居民至今疊石架木冬作春撤以利往來舊橋尙存遺跡焉

### 市鎮

縣城及東西郭牛馬畜市逢雙日買賣粟市春夏在正街秋冬在南街日以爲常

益店鎮在縣東三十里雙日集市金史地理志鳳翔府有驛店鎮卽此

蔡家鎮在縣南三十里雙日集市

高店鎮在縣南四十里渭水南濱單日集市

羅局鎮在縣東南四十里單日集市

青化鎮在縣東北五十里單日集市

龍尾鎮在縣東二十里無集市

棗林鎮在縣東南三十里無集市

岐山縣志二  
宋時有岐陽鎮在縣東北五十里岐陽舊縣地今廢矣

學堂

高等官小學堂一所在城內東街

體操場一所在高等官小學堂後

勸學所一處在正街

初等官小學堂在城關者五處在鄉者各里分設二十六處共三十一處

其民間自設學堂村莊所在多有然時設時止其數不可得而紀云

山

岐山縣境南北皆山而縣以山得名則岐固北山之總名也

箭括山距縣東北五十里在仁岐通濟二里內南距麻葉溝水源十五里嶺左側有黑龍洞爲邑中極幽異之境云

龍泉山在箭括嶺東距縣東北五十五里在青化里內山有九泉曰龍泉其東麓

接扶風界



三龍山在箭括嶺西距縣東北四十五里在通濟尙善二里內南距龍尾溝水源十餘里

東崛山在三龍山西距縣東北四十里有景陽洞玉皇樓珍珠洞諸勝在尙善里內

西崛山在東崛山西五里許距縣東北三十里在尙善廣惠二里內相傳西域僧鳩摩羅什繹佛經於此東西二山爲邑之勝境其間有水名崛山溝水

北太白山在縣北山內十五里上有太白廟禱雨輒應在仁智里內以上諸山其陰皆接麟遊界

圖山距縣東北十五里在廣惠里內下有畫圖寺相傳唐移今縣治時先卜此地畫圖營繕未果因以圖名山

天柱山距縣北十里在潤德里內其山高峻迴出羣峰故以爲名

蓮花山在圖山北距縣東北二十里在廣惠里內層峰疊翠形似花開故名上有泉水清冷澈底其味甚甘

書卷山在天柱山北距縣北十五里在潤德里內

五將山距縣北五十里在仁聖里內

鳳凰山距縣西北十五里卷阿西北隅亦名鳳鳴岡在仁聖里內山麓有洞中有元武石像石白似玉雕鏤古雋座下連山其石皆青惟像獨白相傳昔年雷雨大作崖崩而像出山下潤德泉出焉

石壩嶺一名十八嶺距縣北四十里北在仁聖里內以上諸山其西北皆連鳳翔界

以上皆邑之北山也以岐爲主皆由東而西云

青峰山距縣西南百五十里西南接寶鷄界在同峪里內

石橋山距縣西南五十里西接寶鷄界在安化同峪二里內

石樓山距縣西南六十里在諸葛高店二里內同峪白玉二水出焉形如樓閣故名上有龍湫禱雨輒應平時山腰出雲若瀾漫山頂必霖雨諺云石樓戴帽農夫高臥屢驗不爽

奧山距縣南百四十里在桃川里內南接衙嶺東連觀音嶺嶺斷於太白之三才峽奧山衙嶺之間桃川水出焉

西涼廬山距縣南五十里在諸葛里內五丈原西白玉河水之所經也

棋盤山距縣南五十里在落星里內北連五丈原

東涼廬山距縣東南七十里在落星馬磧二里內

衙嶺卽秦嶺也在桃川西南距縣南百五十里在桃川里內五里坡嶺亦在桃川西南距縣百九十里在桃川里內西南與寶鷄接界

三才峽卽太白山之別峰與太白橫互相連西遙接奧山東界郿縣

白雲峽在三才峽之西其山隘狹阻深人跡罕到

以上皆邑之南山也自西而東其陽多接秦嶺秦嶺之陽則爲佛坪之界云

周原距縣東北四十里在仁岐里內卽詩所謂周原膺膺者也

七里原距縣南五里在資福里內當橫雍二水之間

積石原距縣南十五里其地橫亘安化渭陽懷賢懷仁馬磧雒陽六里之內當雍

渭二水之間卽三國志所謂北原也

五丈原距縣南五十里在諸葛落星二里內原亦山之類故附焉

水

岐境南條之水皆入渭水渭水源出於渭源縣鳥鼠同穴山東流至縣西南四十里寶鷄縣界朱家灘入境行里許同峪水自南入焉又東四里許逕令狐坡中有淤沙又八里過蔡家鎮東南又五里中有土梁又三里逕五丈原白玉水石頭河自南合流入焉又東四里至御官營出境入郿縣界行境內約二十六里境內惟渭水爲大水皆平流可通舟楫然冬春之交沙多水淺則不可行大船矣

同峪水源出縣西南六十里之石樓山南東北流約二十五里入渭水水多行山谷間

白玉水源出縣南八十里之石樓山南北流二十二里經西涼廬山之麓出山又十五里逕五星堡至五丈原西北隅折而東流繞原北八里合石頭河復折而東北流五里入渭水約行五十里

斜谷水一名桃川一名武功水一名石頭河源出縣南百五十里奧山之陰石樓諸山之陽東北流三十里過觀音嶺又十里過白雲峽峽中小水入焉又三里三才峽小水自郿縣界入焉折而北流入郿縣境又十五里分爲三支西支爲石頭河自縣東南六十里入境西北流十二里至落星堡又十里許至五丈原東北隅與白玉水合又五里入渭水約行九十里行郿縣界內者約十五里水之過斜谷關也地有魚洞臥虎石石甕斜關濤諸勝魚洞在斜谷關內三十里瀑布出石穴中每歲穀雨後則魚出出時先有小魚來往遊戲謂之試水俄而玉腮銀甲先小後大旣美且多然一歲一次餘時則絕無矣臥虎石斜谷關兩山對峙處有石高約五尺形如臥虎徧體畢肖山水暴漲仍見虎形見者咸以爲異云石甕自斜關西行迤南夾澗之間有石焉周平中凹大可三尺形圓若甕山腰瀑布溜衝甕中深罔知底時有錦鯉遊泳人莫敢捕捕卽雷雨交作斜關濤大雨河漲怒濤如雷聲聞數里然其聲自上而下卽晴霽自下而上必久霖旅客以此卜行止焉斜谷關口在縣東南六十五里

岐境北條之水皆入於雍水雍水之下流名漳水源出鳳翔縣雍山至縣西南十五里鳳翔縣界河北村入境東南屈曲流十五里至河交村橫水自西北合兩小水來入焉又東流十里至棗林鎮折而北流八里魯班溝水入焉復折而東流五里龍尾溝水入焉又折而東南流四里麻葉溝水入焉又轉而南流紆迴十里至距縣三十里之莊子頭出境入扶風縣界約行境內五十二里此水與渭水其流皆自西而東云

橫水其上游爲漆岐杜三水漆水源出麟遊縣西北二十里之青青山岐水源出隋置之普潤縣杜水源出杜陽山三水合爲橫水至縣西十里孫家河入境東流六里許佛指溝水自北入焉又三里南溪溝水自北入焉南流十五里至河交村入雍水約行二十五里

潤德泉水源出卷阿唐宣宗所賜名也每十餘年間時出時涸南流成佛指溝約二十里入橫水

南溪溝水距縣城半里許下流南入橫水約行五里許

魯班溝水源出龍尾坡北下流南入漳水約行十五里許

龍尾溝水源出人旺村下流南入漳水約行十五里許

麻葉溝水源出青化鎮西下流南入漳水約行二十里許以上四水皆小水也夏秋漲而冬春微或至涸竭焉

水之可灌田者斜谷之水明萬歷間鳳翔知府沈縉至斜谷口相地勢疏渠灌落星里田至今利賴無窮焉

珍珠泉在積石原南麓下地廣六七分迸出三泉噴湧成珠大若龍眼下疏三渠灌田數十頃

潤德泉水流入佛指溝者附近居民築堰灌田頗賴其利

崛山溝水出東西崛山之間夏秋大雨時行山水陡發至朝陽里則漸平輪流灌田不費人力其下流入魯班溝

以上數水雖有灌溉之益而起訖率不甚遠其小水尤不可常恃非若京兆之鄭白大河之秦漢諸渠也故不詳載其承注方向云

道路

道路者地理之一事也然其爲用至大則地理之要務矣 國朝乾隆緬甸之役趙翼謂傅文忠曰戛鳩普洱按圖不過三寸實則四千里而遙可知經緯度之虛綫不足憑而切用必徵諸實踐也夫地輿終古不移而或有周道鞠爲茂草山蹊介然成路者山川如故城郭或非要害所存開鑿頓異故也今志道路於郡縣往來之通衢詳爲紀述即有道不通車馬而爲險要之所在者亦俱搜採無遺焉

由縣治而東出東郭十二里至魯班溝卽俗所謂硯瓦溝也踰溝又東八里至龍尾溝踰溝又東五里至麻葉溝踰溝又東五里至益店鎮又東五里至扶風西界接路計三十五里此本境東通省會之大道也

由縣治而西出西郭里許至西教場有支路出西南又西六里至佛指溝踰溝里許至鳳翔東界接路計八里其支路由西教場西南者五里至張家河渡橫水又三里至董家霧又一里至鳳翔東界接路計十里此本境西達府城西南通寶鷄之大道也



由縣治出南門有二道焉其一東南出爲適郿縣之路其一爲入南山之路南行里餘至高家莊渡橫水又南七里至大慈營南下七里原渡雍水南上積石原八里至楊柳營又南九里至獨箭頭下原又六里至蔡家鎮又西南五里渡渭又西南五里至高店鎮又折而東南三里至五星村渡白玉水上五丈原自此以往路不復通車矣又南十里至張家村下原又南七里至落星堡又南十里至斜谷西關又南十里至蹇溝口渡斜谷水又南入郿縣界內十里許至音高凹又南入本境十里許至柳家村入三才峽又南十里許過大白梁又南十里許至佛坪北界接路計一百二十里其一東南出者八里至路家營又東南七里至鞏寺村又東南十五里經牛家河渡雍水至棗林鎮又東南十里至羅局鎮又東南十里至尉家堡接郿縣西界路計五十里東行者則至羅局鎮而止

由縣治出北門折而東北三里至南吳邵村卽不通車馬矣里許至乾河橋踰橋又東北三里至李家溝踰溝上吳邵坡卽北山麓矣又東北九里至小勞川又十里至大勞川上晒藥嶺又東北十五里至西崛山又北五里至四灣里又北五里

至五將廟接麟遊南界路計五十里此入北山之路也

物產

太平之世地不愛寶荒札而後百物不蕃物產之盈絀實生民利病之源也志物產

動物鳥獸皆恒畜亦有虎狼狐兔之類然虎不常見也亦宜蠶然甚少矣

植物五穀皆有之而麥爲多菜籽包穀罌粟大小藍瓜果蔬菜無弗宜者其木則有松柏桑柘杏桃榆柳椿樗桐楸槐楊梓漆竹其藥則有芫花小薊甘遂地黃半夏香附車前益母芎藭薄荷牛蒡子然秦地所在多有無特產也其南北山草木花藥種類綦繁然採取所不及其名不可得而記焉

鑛物岐地新蒸資於北山木炭資於南山無煤礦往者時從麟遊來後彼處礦爲水滄始絕迹矣岷山南溝之石文理可觀土人多爲硯以市之然其質不佳故無稱之者

動物製造無

植物製造木土竹工所爲之器僅供本邑之用無行遠者惟挂麵燒酒爲著而酒則以鳳翔著名

鑛物製造惟鐵工爲農器之類而已無他製造也

### 商務

商務爲新政之一必水陸輻湊之地乃有足言岐邑之商不過粗通有無而已然時會轉移則形勢爲變於商務亦不無關係焉志商務

本境所產之物所製之品惟酒與土藥挂麵出境除本境銷售外酒售於省城爲多本省亦有各處發運者土藥銷售於本省間及直隸山西河南挂麵每年冬間農閑始以爲業未成莊惟零星小販而已然三者皆飲食之物贏時時絀視歲爲轉移無確數可稽

初西鹽之入岐境者最爲大宗間數日中橐駝數百載鹽而來捆貨而去絡繹不絕其貨多從他境運入暢銷西境而市鹽者亦四集市中最爲興盛自近年以來載鹽者絕迹而市井頗蕭條矣